

CONVENIO DE COLABORACIÓN ENTRE A CONSELLERÍA DE EDUCACIÓN, CIENCIA, UNIVERSIDADES E FORMACIÓN PROFESIONAL E A UNIVERSIDADE DE SANTIAGO DE COMPOSTELA PARA COLABORACIÓN NA PROCURA DA MELLORA NA CALIDADE DO SISTEMA EDUCATIVO.

Santiago de Compostela, 31 de outubro de 2024.

REUNIDOS

Dunha parte, D. Román Rodríguez González, conselleiro de Educación, Ciencia, Universidades e Formación Profesional, que en virtude do seu nomeamento a través do Decreto 44/2024, do 14 de abril, polo que se nomean os titulares das consellerías da Xunta de Galicia (DOG número 73, do 14 de abril) actúa de conformidade coas facultades que lle atribúe o artigo 34 da Lei 1/1983, do 22 de febreiro, de normas reguladoras da Xunta e da súa presidencia.

Doutra parte, D. Antonio López Díaz, reitor magnífico da Universidade de Santiago de Compostela (en diante, a USC), que actúa en nome e representación dela, en virtude do Decreto 35/2022, do 17 de marzo (DOG do 22 de marzo), do seu nomeamento, e polas facultades conferidas pola Lei orgánica 2/2023, do 22 de marzo, do sistema universitario, e polo Decreto 14/2014, do 30 de xaneiro, polo que se aproban os estatutos da USC.

Interveñen en función dos seus respectivos cargos e no exercicio das facultades que, en nome das entidades que representan, teñen conferidas e

EXPOÑEN

PRIMEIRO.- Que a Consellería de Educación, Ciencia, Universidades e Formación Profesional (en diante, a Consellería) é consciente da importancia dunha formación inicial docente de calidade e aliñada coa realidade actual dos centros educativos en Galicia, coñecendo tanto a súa historia e desenvolvemento como os programas e plans que na actualidade están en funcionamento no sistema educativo en Galicia. En especial, resulta vital que a formación inicial do profesorado afonde nos procesos de dixitalización ética dos centros educativos e o desenvolvemento de competencias no marco do enfoque da aprendizaxe ao longo da vida.

SEGUNDO.- Que a Facultade de Ciencias da Educación da Universidade de Santiago de Compostela (USC) oferta os Graos de Mestre en Educación Infantil e Primaria, así como o Master Universitario en Profesorado de Educación Secundaria Obrigatoria e Bacharelato, Formación Profesional e Ensinanzas de Idiomas, todos eles títulos habilitantes para o exercicio da docencia. Paralelamente oferta o Grao en Pedagogía, sendo a única no Sistema Universitario de Galicia que imparte esta titulación. Ademais, oferta outras titulacións, todas relacionadas coa Educación, que son relevantes na mellora da calidade docente e educativa en sentido amplo.

TERCEIRO.- Que a Consellería e a USC coinciden en considerar que a calidade do sistema educativo galego, a súa equidade e os procesos de innovación que isto implica, precisan de coordinación e cooperación para o desenvolvemento de competencias profesionais docentes relevantes, actualizadas e de calidade durante a formación inicial, que permita a incorporación ao sistema educativo galego de docentes competentes que dean resposta aos desafíos e necesidades do seu tempo. De igual maneira, coinciden na importancia de dotar as persoas tituladas en Pedagogía dun coñecemento vivencial dos contextos educativos en Galicia e a súa realidade actual, de xeito que o seu futuro labor de orientación, xestión e investigación se desenvolva coa máxima calidade e rigor. Para acadar este obxectivo é preciso establecer pontes de colaboración e cooperación interinstitucionais.

En consecuencia, as entidades, de conformidade co exposto, formalizan este convenio no campo da formación e da investigación, de acordo coas seguintes

CLÁUSULAS

PRIMEIRA.- Obxecto

O presente convenio ten por obxecto fixar un marco de colaboración institucional entre a Consellería de Educación, Ciencia, Universidades e Formación Profesional e a Universidade de Santiago de Compostela que redunde na mellora da formación do alumnado das titulacións impartidas por esta universidade habilitantes para o exercicio da docencia.

SEGUNDA.- Actuacións a desenvolver

Para estes efectos, a Consellería e a USC, a través da Facultade de Ciencias da Educación, colaborarán no desenvolvemento das seguintes actuacións:

- Na creación e xestión dun “Polo creativo demostrador” na Facultade de Ciencias da Educación (Campus Norte). A tal efecto a Consellería cederá o material e equipamento correspondente e facilitará o acceso á formación en Polos creativos ofertada pola Rede de Formación Permanente do Profesorado. A USC, pola súa banda facilitará un espazo axeitado e suficiente, encargándose do correcto mantemento do material cedido e fomentando o seu uso en actividades formativas para os/as futuros/as docentes.
- Na creación dun “Recuncho MUPEGA” na Facultade de Ciencias da Educación (Campus Sur). A tal efecto a Consellería cederá temporalmente pezas e material cunha rotación non inferior a 6 meses. A USC, pola súa banda, facilitará o espazo axeitado e suficiente, asinando os correspondentes contratos de cesión, asumindo os seguros que procedan e custodiando con dilixencia a súa integridade.
- No aloxamento de aplicacións interactivas e actividades dixitais desenvoltas polos grupos de investigación da Facultade que sexan de aplicación directa nos centros educativos sostidos con fondos públicos e nos que a Consellería teña manifestado o seu interese, aos efectos de mellorar as garantías de protección de datos e privacidade da comunidade educativa. Estes recursos didácticos dixitais integraranse, sempre que sexa posible, nunha aula dixital específica creada ao efecto no marco das pautas establecidas polo órgano competente (AMTEGA).

TERCERA.- Vixencia

O presente convenio producirá efectos desde a súa sinatura e terá unha vixencia de catro anos. Poderá ser denunciado polas partes en calquera momento unha vez transcorrido o primeiro ano de vixencia, mediante comunicación escrita á outra parte.

A extinción producirá efectos unha vez transcorridos tres meses desde a dita denuncia, sen prexuízo de finalizar aquelas actuacións xa iniciadas e que, por razóns de interese público, se deban levar a cabo.

Así mesmo, ao abeiro do disposto no artigo 49.h) da Lei 40/2015, do 1 de outubro, de réxime xurídico do sector público, as partes poderán acordar unanimemente a súa prórroga por un período de catro anos.

CUARTA.- Comisión de seguimento

Para o seguimento da execución e do desenvolvemento do presente convenio crearase unha comisión mixta, composta por dous representantes de cada unha das institucións asinantes e unha persoa funcionaria da Consellería, que actuará como secretario/a. Corresponderá á comisión de seguimento velar polo correcto cumprimento do acordo, impulsando a realización de cantas actuacións sexan necesarias para o seu desenvolvemento e execución.

A comisión reunirse cantas veces sexa preciso para a boa marcha da execución do acordo a petición de calquera das partes.

A súa actuación axustarase ao establecido na Lei 40/2015, do 1 de outubro, do réxime xurídico do sector público, e na Lei 16/2010, de 17 decembro, de organización e funcionamento da administración xeral e do sector público autonómico de Galicia.

QUINTA.- Modificación e resolución do convenio

1. O convenio poderá modificarse por mutuo acordo das partes asinantes.

2. Segundo se establece no artigo 51 da Lei 40/2015, do 1 de outubro, o convenio extínguese polo cumprimento das actuacións que constitúen o seu obxecto ou por incorrer en causa de resolución.

Son causas de resolución:

- a) O transcurso do prazo de vixencia do convenio sen terse acordado a súa prórroga.
- b) O acordo unánime de todos os asinantes.
- c) A denuncia do Convenio cando se estime que se produciron alteracións substanciais nas condicións nas que foi subscrito.
- d) O incumprimento das obrigacións e compromisos asumidos por parte dalgún dos asinantes.

Neste caso, calquera das partes poderá notificar á parte incumpridora un requirimento para que cumpra no prazo de dous meses coas obrigacións ou compromisos que se

consideran incumpridos. Este requirimento será comunicado ó responsable do mecanismo de seguimento, vixilancia e control da execución do Convenio e ás demais partes asinantes.

Se transcorrido o prazo indicado no requirimento persistira o incumprimento, a parte que o dirixiu notificará ás partes asinantes a concorrencia da causa de resolución e entenderase resolto o Convenio.

- e) Por decisión xudicial declaratoria da nulidade do Convenio.
- f) Por causa de forza maior que imposibilite o obxecto do Convenio.
- g) Por calquera outra causa distinta das anteriores prevista nas leis.

A resolución do Convenio non afectará á finalización das actividades que estiveran en execución, para as que a Comisión de seguimento establecerá un prazo improrrogable de finalización, en cumprimento do disposto no artigo 52.3 da Lei 40/2015, do 1 de outubro, de Réxime Xurídico do Sector Público.

SEXTA. Protección de datos

O cumprimento das obrigas deste convenio axustarase ás esixencias derivadas da normativa reguladora en materia de protección de datos de carácter persoal, no que corresponde á confidencialidade da información e dos resultados, aplicando as medidas de carácter técnico, administrativo, informático e organizativo que resulten necesarias para cumprir cos requisitos legais e, en particular, garantindo a seguridade e integridade dos datos e a súa protección fronte a alteracións, perda, tratamentos ou accesos non autorizados.

Serán de aplicación todos os dereitos e obrigacións derivados da normativa aplicable en materia de protección de datos.

SÉTIMA.- Publicidade e transparencia

O presente convenio publicarase de acordo co previsto no artigo 15 da Lei 1/2016, do 18 de xaneiro, de transparencia e bo goberno e no Decreto 126/2006, do 20 de xullo, polo que se regula o Rexistro de convenios da Xunta de Galicia.

Así mesmo, ambas partes farán a difusión que corresponda nas súas respectivas sedes electrónicas.

A sinatura deste convenio suporá o consentimento expreso das partes para incluír e facer públicos os datos referidos ao acordo de conformidade co artigo 15 da Lei 1/2016,

do 18 de xaneiro, de transparencia e bo goberno, e co Decreto 126/2006, do 20 de xullo, polo que se regula o Rexistro de Convenios da Xunta de Galicia.

OITAVA.- Notificación electrónica

Segundo o artigo 14.2 da Lei 39/2015, do 1 de outubro, do procedemento administrativo común das administracións públicas, os colectivos que están obrigados a relacionarse a través de medios electrónicos coas administracións públicas, e polo tanto, a recibir notificacións por canles electrónicas son: as persoas xurídicas, as entidades sen personalidade xurídica, os colexios profesionais, os que representen un interesado que estea obrigado a relacionarse electronicamente coa Administración e, os empregados das administracións públicas para os trámites que realicen con elas por razón da súa condición de empregado público.

As notificacións realizaranse só por medios electrónicos a través do Sistema de Notificación Electrónica de Galicia Notifica.gal, (<https://notifica.xunta.gal>). Para poder acceder a unha notificación electrónica, o interesado deberá contar cun certificado electrónico asociado ao NIF que figure como destinatario da notificación (persoa física ou xurídica). Así mesmo, o interesado pode autorizar a calquera outra persoa a acceder ao contido das súas notificacións.

NOVENA.- Natureza xurídica

Este convenio ten natureza administrativa, e queda fóra do ámbito da Lei 9/2017, do 8 de novembro, de contratos do sector público, que os exclúe expresamente o artigo 6.1, rexéndose polo establecido na Lei 40/2015, do 1 de outubro.

As discrepancias que poidan xurdir na interpretación, aplicación e efectos do presente convenio resolveranse pola Comisión de seguimento.

E, en proba de conformidade, asínano dixitalmente.

O conselleiro de Educación, Ciencia,
Universidades e Formación Profesional

O reitor da USC

Román Rodríguez González

Antonio López Díaz